

**Elak Media Jadi Mangsa, Polis Rangka SOP Khusus Untuk Liputan Perhimpunan Bernama**  
**7 Ogos, 2012**  
**From Alan Ting**

KUALA LUMPUR, 7 Ogos (Bernama) -- Polis Diraja Malaysia (PDRM) akan memutuskan tidak lama lagi mengenai Prosedur Operasi Standard (SOP) berhubung kaedah yang harus diambil bagi menangani petugas media ketika membuat liputan sesuatu perhimpunan.

Ketua Polis Negara Tan Sri Ismail Omar berkata SOP itu, yang akan diumumkan sebulan daripada sekarang akan dirangka dengan mengambil kira pandangan dan cadangan petugas media yang pernah membuat liputan berkenaan seperti ketika perhimpunan yang ditunjangi pembangkang 28 April lalu.

"Polis dan media perlu duduk bersama bagi membincangkan SOP ini. Kami mahu anda (media) datang dan beri beberapa cadangan kepada kami. Kami mahu dengar sendiri daripada wartawan.

"Kami perlu sedikit nasihat, jadi kami mahu mendengarnya daripada anda. Saya rasa ini yang terbaik kerana anda berada di sana, melihat apa sebenarnya yang berlaku ketika itu (Perhimpunan 28 April)," katanya kepada pemberita selepas menghadiri majlis Jalinan Ramadan 2012 bersama pasukan keselamatan anjuran Pergerakan Wanita Umno, di sini, Selasa.

Beliau mengulas laporan Panel Siasatan Bebas mengenai perhimpunan itu yang mendapati tiadanya SOP di kalangan pasukan polis menjadi punca berlakunya insiden wartawan dan jurufoto mendapat kecederaan.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=686193>